

TIERRA DEL SOL TA FINALIZA PLANNAN PA CANCHA DI GOLF



Doug Coolman di Ed Stone & Associates mustrando e plan di Tierra del Sol na esnan presente.

ORANJESTAD(AAN) -- Recientemente Sun Development a anuncia e fase final di e preparacionnan pa Aruba su promer "Master Planned Golf Community" cu lo worde traha na Arashi, e parti noord di Aruba.

Na e reunion aki tabata presente diseñador y consehero local internacional, varios oficial di Gobierno y Ministro di Turismo y Asuntonan Economico Ing. E. Briesen.

E proyecto, mihor conoci como Tierra del Sol ta encera un "Championship Golfcourse" di 18 buraco diseña pa Robert Trent Jones II y rondona di casnan y condominio.

Segun Mito Martis di Sun Development, Tierra del Sol

lo trece tremendo beneficiannan pa Aruba y su industria turistico door di atrae bishitantenan cu ta gasta mas y ta aprecia e wegá di golf.

E sitio ta presta su mes masha bunita pa e proyecto, brindando vistanan excepcional di lamar y e ambiente nativo. E cancha di golf ta worde diseña pa acomoda su mes den e topografia y e vegetacion nativo di ey banda pa asina preserva y embecece e bunita di e area.

Tambe lo e crea un reto excitante pa hungadornan di golf di bishita y hendenan local.

E consideracion mas importante ta awa pa irrigacion. Esaki ta worde suministra for di e planta di tratamiento di

Bubali, door di Gobierno di Aruba.

Tambe tin varios atraccion planea manera un "clubhuis" incluyendo restaurant, piscina, tienda di Golf y Tennis y canchanan di Tennis.

E architecto Edward Stone Jr. cu ta internacionalmente conoci ta diseña e comunidad rond di e cancha di Golf. Su meta ta pa preserva e integridad di e naturaleza na e sitio mientras cu e ecologia unico di ey banda lo worde complementa.

Tierra del Sol lo bira un proyecto cariñoso cu lo embecece e paisaje na Arashi mientras e lo ofrece na e isla un otro posibilidad di recreo. E cancha di golf lo ta den operacion pa e temporada 1993/1994.